

NOTA MAKLUMAN
KES ADUAN
MENGENAI KES KEBAKARAN HUTAN BELUKAR DI GONG BADAK,
DAERAH KUALA NERUS, TERENGGANU DARUL IMAN
PADA 04 MEI 2016

TUJUAN

Nota Makluman ini adalah untuk memaklumkan hasil siasatan ke atas kes kebakaran hutan belukar di Gong Badak Daerah Kuala Nerus, Terengganu Darul Iman.

LATARBELAKANG

2. Nota Makluman ini disediakan susulan daripada kekerapan aduan yang diterima oleh JAS Terengganu bermula pada **21 Mac 2016 sehingga semalam (03 Mei 2016)**. Lokasi kebakaran hutan belukar ini adalah di kedudukan Long.: 103.068456° dan Lat.: 5.392974°. Kawasan hutan belukar (pokok gelam) yang terbakar ini bersebelahan dengan tapak pembinaan Bandar Baru Kuala Nerus dan berhampiran dengan Kawasan Industri Gong Badak serta hampir dengan kawasan kediaman penduduk. Siasatan awal mendapati lokasi kebakaran ini adalah **bertanah gambut**.

PERKARA-PERKARA YANG HENDAK DIMAKLUMKAN

3. Daripada pemerhatian yang dilakukan, terdapat beberapa tempat yang berasap dengan agak ketara (**rujuk Lampiran 1 Gambarfoto 1**) dan **jarak premis terdekat adalah lebih kurang 300 meter iaitu Premis RD Paper Sdn. Bhd.**

4. Keseluruhan kawasan yang diperhatikan **masih berasap (rujuk Lampiran 1 Gambarfoto 2)** dan pihak pasukan penyiasat menjumpai 5 lokasi pembakaran terbuka dikawasan belukar tersebut. Pemerhatian yang dilakukan tidak menemui sebarang maklumat yang boleh mengaitkan kejadian kebakaran belukar ini dilakukan bagi tujuan pembukaan tanah secara besar-besaran sama ada bagi

kegunaan pertanian mahupun projek pembangunan oleh mana-mana individu atau syarikat.

5. Jabatan Bomba dan Penyelamat Negeri Terengganu telah dimaklumkan mengenai kebakaran ini dan tindakan pemadaman sedang dilakukan. Operasi pemadaman hari ini dilakukan dengan kekuatan 15 orang anggota dan akan ditambah lagi mengikut keperluan (**rujuk Lampiran 1 Gambarfoto 3**). **Pusat Kawalan Bomba (PKB) akan dibuka bermula hari ini.**

6. Siasatan lanjut yang telah dijalankan oleh Jabatan Alam Sekitar Negeri Terengganu mengenai faktor geografi kawasan berkenaan dan juga maklumat-maklumat daripada siasatan di lapangan adalah seperti berikut:-

6.1 **Semakan Portal GIS**

Dari aspek guna tanah, kawasan yang terjejas diklasifikasikan sebagai kawasan hutan belukar. Semakan yang dibuat melalui data di dalam portal GIS turut mendapati kawasan yang terjejas adalah **bertanah gambut**. Dari aspek hidrologi, didapati **terdapat** alur air dalam jarak lebih kurang 400m berhampiran kawasan terjejas.

6.2 **Siasatan pada 4 Mei 2016**

- (i) Tiada maklumat atau bukti yang menunjukkan kawasan yang terbakar adalah untuk dibangunkan bagi kegunaan pertanian atau kawasan kediaman kerana **pihak penyiasat gagal menemui individu yang boleh dikaitkan dengan kes.**
- (ii) Kawasan ini mempunyai sekitaran yang berpenduduk padat kerana kawasan ini adalah berdekatan dengan kawasan industri dan juga Institusi Pengajian Tinggi (IPT).

- (iii) Operasi Pemadaman sedang giat dijalankan oleh pihak bomba dan baki kawasan yang masih berasap adalah lebih kurang 8 hektar.
- (iv) Kejadian kebakaran hutan belukar ini **berpotensi untuk merebak kerana keadaan angin yang kuat ketika ini dengan cuaca panas yang berterusan semenjak Januari 2016.**

TINDAKAN-TINDAKAN JABATAN ALAM SEKITAR NEGERI TERENGGANU

7. **Meningkatkan pemantauan dan penguatkuasaan** terhadap lokasi kawasan yang terlibat bagi memastikan tiada aktiviti pembakaran terbuka dilakukan oleh mana-mana individu seperti yang termaktub di bawah Seksyen 29A, Akta Kualiti Alam Sekeliling 1974 dan Perintah-Perintah Kualiti Alam Sekeliling (Aktiviti Yang Diisytiharkan) (Pembakaran Terbuka) 2003.

8. Memasang Portable PM10 di Sekolah Kebangsaan Gong Badak bagi mendapatkan nilai Indeks Pencemaran Udara (IPU) di sekitar kawasan tersebut.

8. Mengenalpasti individu atau pihak yang bertanggungjawab (pemunya) terhadap kawasan hutan belukar yang terbakar untuk mengambil tindakan yang sewajarnya bagi mengekang daripada kejadian kebakaran ini berulang.

PENUTUP

Adalah dipohon mengambil maklum mengenai hasil siasatan ke atas kejadian kebakaran hutan belukar belukar di Gong Badak Daerah Kuala Nerus, Terengganu Darul Iman.

**Jabatan Alam Sekitar Negeri Terengganu
04 Mei 2016**



GAMBARFOTO 1: SEBAHAGIAN KAWASAN HUTAN BELUKAR YANG TERBAKAR DENGAN ASAP SEDERHANA TEBAL KELIHATAN DI LOKASI KEBAKARAN)



GAMBARFOTO 2: SEBAHAGIAN KAWASAN HUTAN BELUKAR YANG MASIH BERASAP DI LOKASI KEBAKARAN



**GAMBARFOTO 3: ANGGOTA BOMBA SEDANG BERBINCANG BAGI
MEMANTAPKAN LAGI OPERASI PEMADAMAN**